



STARIJI BRAT, STARIJA SESTRA BOSNA I HERCEGOVINA

Strateško planiranje saradnje i umrežavanja projekta *Stariji brat, starija sestra*

Na **Prvoj regionalnoj konferenciji preventivnog projekta «Stariji brat, starija sestra»**, održanoj 12. maja/svibnja 2007.g., u Sarajevu, UG NARKO-NE iz Sarajeva i Nova Generacija iz Banja Luke, uspostavili su saradnju za zajednički razvoj projekta. Cilj zajedničke saradnje je unapređenje socijalnog uključivanja i pružanje psihosocijalne podrške vulnerabilnoj djeci, kroz volonterski rad mladih i odraslih, te promoviranje dosadašnjih uspješnih rezultata sličnih projekata u regionu.

Predstavnici organizacija Nova Generacija i UG NARKO-NE, od maja 2007.g., počeli su uspostavljati osnovu za daljnji **razvoj strateškog projekta**, sa 6– 8 partnera iz bh. gradova koji imaju fakultete, a koji bi u periodu od 2009. do 2011/12. konstituirali strukture i procedure za održiv projekt u BiH i implementirali projekt u njihovoj zajednici.

Na **Drugoj konferenciji projekta „Stariji brat, starija sestra“ - Socijalno uključivanje djece u riziku kroz volonterski angažman mladih i odraslih, održanoj 05.11.2008.g.u Banjoj Luci**, konstituirale su se platforme za partnerske nevladine organizacije, ustanove socijalne zaštite, fakultete kao i političke instance odgovorne za reformu sistema socijalne zaštite, kako bi se projekt *Stariji brat, starija sestra*, kao projekt socijalnog uključivanja djece u riziku, mogao proširiti i razvijati i u drugim gradovima u BiH.

Budući da se projekt realizira u trostrukom partnerstvu

nevladina organizacija – ustanova socijalne zaštite – fakultet,

na konferenciju su bili pozvani predstavnici pomenutih ustanova iz 9 bh. gradova: Bijeljina, Bihać, Doboj, Tuzla, Zenica, Sokolac, Istočno Sarajevo/Pale, Foča i Mostar. Pored toga, na konferenciju su bili pozvani i predstavnici političkih institucija nadležnih za reformu sistema socijalne zaštite u BiH.